

Domat se prepara per las elecziuns communalas

La PCD ha dau l'entschatta culla campagna electorala

DA CLAUDIO WILLI/MC

■ La suprazonza dalla PCD da Domat ha nominau las candidatas ed ils candidats per las elecziuns communalas ch'han liug ils 17 da matg. Previu era che las nominaziuns vegnien fatgas uffizialmein el ravugl dalla radunanza convocada per questa sera el «Sternen». Ussa duei quei succeder pli tard, sco quei ch'il president dalla PCD locala Patrick Bargetzi ha confirmau enviers la FMR. La finamira dalla PCD seigi da restar la pli ferma partida locala, da tschentar il president communal ed esser representada vinavon cun dus geraus ella suprazonza communal.

Erich Kohler ed Armin Tanner recandideschan

La PCD seigi ella favoreivla situaziun da saver ir cun personalitads competentas e cumprovadas en las elecziuns, aschia Bargetzi. Cun il president communal Erich Kohler ed il gerau Armin Tanner sappi la PCD preschentar duas personalitads cumprovadas che seigien prontas da s'engaschar vinavon per il beinstar dalla vischnaunca. Il president communal ha mess impurtonts accents en sia emprema perioda d'uffeci. Siu motto per las elecziuns avon porta – che seigi da veser proximamein sin sia homepage – seigi «cun cumpetenza ed experienza per Domat – cun cor ed experienza per mia patria – cun vasta eglia e visiuns pigl avegnir». Tanner, il cau dil departament construcziun aulta e stabiliments ha gidau a formar ils davos ovg onns essenzialmein il svilup dil vitg, denter auter impurtontas construcziuns da stabiliments da scola ed il davos dalla casa communal, respectond adina il budget, sco el accentuescha bugen.

Da niev cun Nesina Ackermann-Gartmann

Ella suprazonza communal ha la PCD da remplazzar in'impurtontia forza. Gabriella Aschwanden, la menadra dil departament da scola ch'ei era seprofilada sil sectur da scolaziun e formaziun sin plaun surregional, sa buca semetter pli a dispo-



La PCD da Domat presenta sias candidats e ses candidats per las elecziuns communalas: Erich Kohler, Nesina Ackermann-Gartmann (nova) ed Armin Tanner (da sen.).

siziun pervia dalla limitaziun dil temps d'uffeci, quei ch'ei ina gronda sperdita da cumpetenza ed experientscha en quei impurtont departament. Ei seigi uss in veritabel cletg, aschia selegra Bargetzi, ch'ei seigi reussiu alla PCD da gudignar cun Nesina Ackermann-Gartmann in'excelenta candidata. Ackermann-Gartmann, annada 1981, ei carschida si a Domat. Ella ei mumma da dus affons pigns e da professiun scolasta secundara. Ella ha instruiu alla scola romontscha Scolaviva da Laax, Falera, Sagogn e Schluein sil scalem secundar I ed ei ultra da quei stada da 2012 entochen 2019 menadra da scola da Scolaviva. La scolast ha ella frequentau a Domat e silsunter la scola cantunala a Cuera, allura studegia all'Universitad da Friburg e terminau silsunter diversas

scolaziuns da perfecziun sil sectur dalla formaziun. Ackermann-Gartmann s'engascha era sco organista a Domat e Fiem e sco ugau dalla baselgia da s. Pieder.

Elecziuns da cumbat

Ferton che las elecziuns dil parlament communal han liug a Domat per el decurs dil atun han liug questa primavera sper las elecziuns dalla suprazonza era las elecziuns dil cussegl da scola. Cun Denise Flury-Ducommun sa la PCD sebasar vinavon sin ina forza cumprovada che stat vinavon a disposiziun. Da niev sa la PCD proponer Livia Beer-Rampa per il cussegl da scola. Ella ei mumma da dus affons e commercianta da professiun. Durent biars onns eis ella s'engaschada

ella suprazonza dalla Uniun da dunnas da Domat. La suprazonza selegri fetg d'astgar presentar il matg proxim personalitads profiladas e cumprovadas sco era novas personalitads ordvart cumpetentas ed ei perschadada da saver menar cun quellas candidatas e quels candidats ina campagna electorala cun success.

La PCD ha aviert la campagna electorala per las elecziuns communalas. Las autras partidas vegnan a suandar.

Per la suprazonza communal quentan ins culla reelecziun dils caus da departament actuals. Silvia Bisculm Jörg (PS) e Georg Ragaz (independent) valan sco tschentai. Sch'ei dat effectivamein elecziuns da cumbat e schebein la PPS vegn a presentar in'atgna candidatura ei aunc aviert.

Ir curaschusamein egl avegnir

Claustra Glion: Il davos capetel general

■ A caschun dil davos capetel general han las soras dominicanas da Glion proclamau da vuler ir curaschusamein viers il futur plein midas. Perquei secloma il tema da quest onn: «Innovaziun crescha futur». La baselgia catolica drova innovaziuns. Era la Conferenza episcopala svizra vesa quei aschia. Mintga uestgii duessi perquei fixar agens accents persuerter. El senn da quella innovaziun ein duas soras dalla cuminonza claustrala da Glion engaschadas l'entschatta da schaner 2020 ella gruppa «Tiara ed uorden». Tal drova era sias ragischs. Ins ei aschia sedumandaus: En con lunsch catta la protecziun dil clima e tut quei ch'ei colligiau cun quel ina motivaziun biblica? Era las cuminonzas claustralas dueien sededicar a quei process. Las soras da Glion ein era per ir entuorn cun tut quitaun cun las resursas ed el senn da harmonia cun la creaziun divina.

Ellas ein perquei sedecididas da schar installar indrezs da fotovoltaics



Sils tetgs dalla claustra dominicana da Glion vegnan proximamein installai indrezs fotovoltaics.

sin ils gronds tetgs plats da lur stabiliment a Glion.

L'iniziativa Junia vegn inoltrada ils 17 da matg, per la fiasta da s. Junia. Quella iniziativa ei vegnida lantschada da teologas, assistentas e gidontas pastorales sco era da dunnas che s'engaschan per la baselgia. Ins renda attent allas dunnas che vegnan excludas pervia da lur schlattaina cu ei va per las cumpetenzas da decider ella baselgia. Era las soras da Glion sustegnan fetg quell'iniziativa, essend era ellas excludas cu ei setracta da process impurtonts ella baselgia. En quei grau sto ei dar novaziuns.

Las iniziantas envidan en pleivs, cuminonzas monasticas ed era ils fideivels da mirar per dunnas clamadas, encurschar e proponer ellas ils 17 da zercladur cun lur consentiment als uestgs. Cun la promtezia publica per ina missiun sacramental dueien ellas dar alla baselgia ina fatscha humana.

Sora Ingrid Grave, soras dominicanas da Glion

MUSTÉR

Recuors encunter Acla da Fontauna

(rtr/fmr) Helvetia Nostra fa danovamein recuors encunter la Immo Invest Partner SA. Tenor la presidenta da Helvetia Nostra, Vera Weber, hagi l'Immo Invest Partner SA buca midau il project sco ei giavischien. Il project Acla da Fontauna prevesi da construir 61 habitaziuns administradas turisticamein e 30 habitaziuns secundaras. Quellas habitaziuns secundaras cunterfan tenor Vera Weber alla lescha e perquei stoppien ei far recuors tier la Dertgira administrativa dil Grischun.

Fredy Ganz che meina il management da construcziun tier la Immo Invest Partner SA cunterdi denton. Ei hagian midau il project per ch'el corrispundi alla lescha. Ussa sperien ei da puder realisar il niev hotel Acla da Fontauna. Ei hagian numadamein gia spiar bia temps ed impundu entgens daners.

Ils 28 da fevrer ha la vischnaunca da Mustér publicau la lubientscha da baghegiar il niev hotel, tschun casas d'habitar e treis garaschas sutterranas. Sco il president da vischnaunca da Mustér, Robert Cajacob, ha detg enviers RTR seigi il project vegnius midaus cun reducir per la mesadad il diember d'habitaziuns secundaras, vul dir: la Immo Invest Partner SA possi realisar aunc 30. Il schaner 2018 haveva quella firma presentau siu project. Previu fuvu in hotel niev da quatter steilas cun 208 combras ed investziuns da bien 100 milliuns francs.

ACCIDENT

Ciclist grev blessau a Tavanasa

(fmr/mc) Il margis suentermiezdi ha ei dau ina collisiun denter in autist ed in ciclist silla Via sursilvana a Tavanasa. Il ciclist ei vegnius blessaus grevamein.

Igl automobilist da 72 onns carrava il margis suentermiezdi entuorn las 15.30 cun siu vehichel da Rueun viers Trun. Tier la sviada a Tavanasa ha el vuliu untgir viers Danis. Tenor atgnas indicaziuns ha el survesiu en quei mument in ciclist da 70 onns sin siu velo da cuorsa. Entras la collisiun frontala dils dus vehichels ei il ciclist vegnius sdernius a tiara e blessaus grevamein. In team d'ambulanza ha giu quitaun dil blessau ed ha transportau el el Spital regional Surselva a Glion. La polizia cantunala ei lundervi da sclarir las circumstanzias dil accident.

PRAU LA SELVA

Flem sposta la votaziun dils 17 da matg

(rtr/fmr) Ils 17 da matg havess il pievel da Flem giu da decider davart igl avegnir dil center da sport Prau la Selva. Ussa ha denton la suprazonza deciduu da spustar quei termin dalla votaziun. Quei scriva la «Südstschweiz». Motiv per la decisiun seigi la disdetga dalla radunanza communal dils 23 da mars nua ch'ei fuss era vegniu tractau il futur dil center da sport. Plinavon seigi ei era buca cert sche la radunanza communal dils 11 da matg ha liug. Per la suprazonza da Flem eis ei impurtont ch'ei hagi liug in'informaziun davart ils plans dil Prau la Selva avon che menar atras la votaziun.

